


# GJORNÂL DAL LEON

## NOTIZIARI DE PRO LOCO PAÏS DI SAN MARC



Amîs di San Marc, us presentin cun plasê il gnûf numar dal Gjornâl dal Leon, il piçul notiziari de Pro Loco Païs di San Marc. Purtrop ancje chest 2021 al è stât segnât da pandemie, e in cheste pagine o cjatarês dut ce che o sin rivâts a meti impins.

Domenie ai 30 di Mai si è davuelte inte Sale de Comunitât la **Assemblee dai Socs** de nestre Pro Loco. Chest an al jere une vore impuartant cjatâsi, cun dut des tantis restrizions, parcè che si scugnive proviodi ae elezion dal gnûf Diretîf. Dopo i salûts e i ringraziaments al vecjo President, a son stâts presentâts i candidâts che a laran a meti adun il gnûf Diretîf. La Assemblee e à daspò decidût di votâ par aclamazion. Cussì, i socs intervignûts a àn dât acet ai gnûfs components cuntun lunc batimans. Dopo l'insediament, intai dîs vie in dilunc al è stât ancje elet il gnûf President, Danilo Moretuzzo, che al restarà in cjarie par i prossims cuatri agns.



La Assemblee anuâl de Pro Loco e à coincidût ancje cun la zornade di **viertidure dal chiosco** domenicâl. Po dopo il stop imponût da pandemie, intal rispiet des gnovis restrizions, lis sierandis dal chiosco si son finalmentri viertis di gnûf. Come simpri la partecipazion da int e je stade buine, si par chel che al rivuarde i abitants di San Marc, si di bande des personis di divignince dai païs dongje.

Sabide ai 17 di Lui, la nestre Pro Loco e à metût impins la **cene paella**. Intal spazi di fûr a son stadis preparadis lis taulis par dâ acet a cetantis personis che a vevin dât la lôr adesion. Dopo un aperitîf al chiosco, si sin sentâts, curios di cerçâ la paella! Dongje la grande padielone che o viodin inte foto, doi cogos di gale: Il nestri **Ranieri Fioritto** e il so amî **Renato Dominici** che nus àn deliziât cun la lôr famose pietance. Une bieles tace di sangria e la creme catalane a àn piturât di ros e di zâl il biel clime che al jere saltât fûr. Une altre ocasion par passâ insiem una bieles serade.



Sabide ai 24 di Lui la Pro Loco e à screât **Marcus Tai Libris**, una gnove schirie di apontaments culturâi che a cjatin spazi di fûr e dentri la Sale de Comunitât. Massimo Moretuzzo al à dialogât cun **Stefano Montello**, che al à presentât il so ultin libri, **Il tempo delle erbacce**, un interessant tratât di filosofie agrest.

Pûr no jessint cetancj participants, il clime al è diventât subit familiâr. Stefano Montello si è cjatât ben, mostrant la sô simpatie viers la nestre comunitât. Di fat l'autôr e musicist al jere za intervignût cul so grup musicâl FLK inte nestre Fieste dal Païs di San Marc dal 2019.

Dopo la cjacarade, l'autôr al à firmât lis copiis dai libris ai presints. La serade si è concludude cun la cene, preparade simpri des nestris feminis.

mar-  
sins  
tai libris!



Lis nestris no si strachin mai e ancje chest an a puartin indevant la iniziative **Un sole per la vita**, che si propon di judâ i fruts di Haiti. Stant a lis restrizions de pandemie, nol è stât pussibil vendi i ciclamins di fûr de glesie, ma dome prenotant i vasuts vie telefon.



Domenie ai 10 di Otubar, la Pro Loco insiem ae parochie di San Marc, e à proponût il **Gustâ dal Perdon**, una edizion di Sierade dal gustâ comunitari dal 25 di Avrîl. Dopo la messe, dentri inte Sale de Comunitât a son stâts servîts puartadis incredibilis. Cetant buine la partecipazion de int.

Domenie ai 24 di Otubar si è davuelte la gare ciclistiche no competitive **Lui e Lei**. Jenfri il percors si son sfidadis lis cubiis, taiant il traguart a rêt da la Sale de Comunitât. Une bieles colaborazion fra la nestre Pro Loco e i amîs da la ASD Don Bosco di San Marc.



Sabide ai 20 di Novembar e je stade metude impins la **cene a KMO**, par recuperâ une tradizion peade ae nestre Fieste dal Païs di San Marc. Dentri inte Sale de Comunitât, simpri cun grande passion e precision, lis nestris feminis a àn preparât lis taulis. Lis puartadis, dutis preparadis cun prodots dal nestri teritori, a son stadis preseadis di bande di ducj i participants. Coce e cjustinis a son stâts i principai aliments che a àn piturât i plats servîts.

L'intrateniment al è stât affidât a **Claudio Moretti** e **Elvio Scruzzi** dal Teatro Incerto che a àn proponût una version ridote di Çurviei Scjampâts, il spettacul che ancjemò a puartin ator inte nestre region cun tant sucès.

Vinars ai 3 di Dicembar la nestre Sale de Comunitât e à dât acet ai components dal **Teatro del Rifo** che a àn presentât il test **Se non avessi più te...**, un spettacul itinerant metût adun dal Comun di Merêt di Tombe. Il public nol è stât numerôs, ma Manuel, Nicoletta e Matteo a àn sunât e recitât di stes, mostrant dute la lôr passion. A jerin presints ancje i zovins dal **Projet di Agregazion Zovanil** par concludi il lôr percors cuintri la violence su lis feminis. Un piçul rinfresc preparât de Pro Loco pe compagne teatrâl al à concludût la serade, cun la promesse di tornâ a viodisi une altre volte sul palc di San Marc.



Come simpri graciis di cûr a dutis lis personis che a àn contribuît cun il lôr lavôr e cun la lôr passion par che ogni iniziative e saltedi fûr par la miôr. Vuê plui di mai a lôr al va il nestri ricognossiment parcè che cussì fasint a mostrant di vê... il cûr a San Marc!

A ducj un auguri di Buinis Fiestis!